

# KHUTBA JUMMAH

HADHRAT MUHYI-UD-DIN AL-KHALIFATULLAH

*Munir Ahmad Azim*

11 Septembre 2015 ~  
(26 Dhul Qaddah 1436 Hijri)

(Résumé Khutba)

*Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba lors:*

هَذَا بَصِيرَةٌ لِلنَّاسِ وَهُدًى وَرَحْمَةٌ لِقَوْمٍ يُوقِنُونَ ﴿١﴾ أَمْ حَسِبَ الَّذِينَ اجْتَرَحُوا السَّيِّئَاتِ أَنْ  
يَجْعَلَهُمُ كَالَّذِينَ آمَنُوا وَعَمِلُوا الصَّالِحَاتِ سَوَاءً مَحْيَاهُمْ وَمَمَاتُهُمْ سَاءَ مَا يَحْكُمُونَ ﴿٢﴾  
وَخَلَقَ اللَّهُ السَّمَوَاتِ وَالْأَرْضَ بِالْحَقِّ وَلِتُجْزَىٰ كُلُّ نَفْسٍ بِمَا كَسَبَتْ وَهُمْ لَا يُظْلَمُونَ ﴿٣﴾

Haazaa basaaa-iru linnaasi wa hudaww-wa Rahmatul-li-qawmiyy-yuuqinuun. 'Am hasiballazii-najtarahus-sayyi-'aati 'an-naj-'alahum kallaziina 'aamanuu wa 'amilus-saalihaati, sawaaa-'am-mahyaahum wa mamaatuhum ? Saaa-'a maa yah-kumuun. Wa khalaqallaahus-samaawaati-wal-'arza bil haqqi wa litujzaa kullu nafsima-bimaa kasabat wa hum laa yuzlamuun.

« Sa li ene illumination pour dimounes, ene guide et ene grâce pou dimounes avec conviction. Eski bane ki commette de mauvaises actions pensé ki Nous pou traite zot pareil couma bane ki ena la foi et faire de bonnes actions, ki zot la vie et zot la mort pou pareil ? Couma zot juge mal! Allah fine crée bane les ciels et la terre en toute vérité, pou récompense sak l'âme d'après séki li mériter et aucaine injustice pas pou faire zot. » (Surah Al Jathiya 45: 21-23)

Par la grâce d'Allah azordi mo pé continue le même sujet du khutba Jummah ki mo ti commencer deux semaines avant, kot mo ti lire Surah Al Jathiya, Chapitre 45, Versets 21-23.

Dans mo dernier khutba Jummah, mo ti dire ki kan Allah faire sa traitement d'honneur là avec ene dimoune (kot sa dimoune là vine sous refuge d'Allah), bé li couma dire ene très jolie plante

ki émerger, ene plante de bane *Néki* (bonnes actions), ene plante ki rapporte bane fruits. Allah protège li et sape li de toutes sortes de problèmes et di-torts. Maintenant ou capave constater ki sa zaffaire là ti commencer avec ene tipti zaffaire et guette kot sa fine arriver, kot ene tel voyage fine vine facile; péna aucaine difficultés. Tout céki ou ena, ou fine présente avec l'amour, avec l'affection, avec humilité, et ou dire Allah : « *O Allah Mo péna plisse ki sa pou présenter mais certainement mo ena l'amour pou To la religion et sa l'amour ki mo ena pou To Deen, alors oblize moi pou présente tous céki mo ena pou To cause.* » Et l'heure là ou prend ene patience, et alors ou pou trouvé ki traitement Allah pou faire avec ou!

Bane piés ki pas rapporte bane fruits et ki alle sec, alors zot maître même pas prend zot aucaine conte. Maintenant sa zaffaire pas rapporte bane fruits là et alle sec là kan nous réfléchi lors là nous capave alle trouve ene contradiction. Nous conné ki c'est pourtant Allah même ki faire gagne fruits. Alors ki faire sa contradiction là ? Ki so signification ? Nous conne très bien ki c'est Allah même ki faire ene pié rapporte bane fruits, mais ensuite céki nous conner ki ene pié ki pas rapporter et ki alle sec, Allah pas prend aucaine conte d'ene tel pied. **En fait sa zaffaire pas rapporte de fruits et alle sec là li inclure zot l'intention.** C'est bane dimounes ki pas présente devant Allah pou zot reforme. Zot continuer reste dans l'état ki zot été, et zot pas présente zot au service de la religion. Sa c'est bane plantes ki aux yeux d'Allah fine fini décider, fine faire l'intention pou vine sec et pou pas rapporte bane fruits. Couma dire zot fine décider ki zot pas pou vine couma bane piés ki pousser et fleuri. À ce moment là, zot népli reste ene plante du maître, zot vine plutôt ene plante étrangère, ene tel plante ki digne d'être déraciner et zétté en dehors.

Donc pou ene dimoune aussi pareil, si ena bane mauvais dans li et li pas tourne vers Allah et pas prend conte céki Allah fine donne li, pou dépense dans le chemin d'Allah, li pas prend Allah aucaine conte de céki Allah fine dire li, bé Allah aussi pas prend li conte, pareil couma sa plante là ki so maître pas prend conte de li kan même bane zanimaux vine manze li, bane bûcherons coupe li et brûle li, sa pas faire nannié pou maître là. Alors mazine sa bien ki si aux yeux d'Allah ou vine ene véridique, bé aucaine l'opposition pas pou capave cause ou la peine parceki aux yeux d'Allah, ou l'objectif vrai. Dans profondeur ou le cœur bizin ena la vérité. Kan sa pou coumsa, bé personne pas pou capave faire ou di tort. Bane ki pas redresse zot situation, si zot pas faire ene vrai promesse d'obéissance avec Allah, bé Allah pas prend zot conte.

Dans le monde entier ena des millions de bane dimounes ki pé mort assassiner pou nannié. Sans aucaine raison pé touye zot et là aussi bane dimounes pas concerner. Alors couma Allah pou prend conte bane dimounes ki pas prend bane *Banda* (serviteurs) d'Allah conte. Donc, ou bizin comprendre le sujet de prend conte de tous sa bane *Banda* d'Allah ki éparpiller à travers le monde. Si ou pé vivre dans ou confort et ou pas pé prend conte ou l'environnement, si ou pas conscient ki l'injustice ou environnement pé souffert, bé à ce moment là, sa bane bonne nouvelles là li pas pou ou. C'est pas ou ki pou gagne sa. Li nécessaire ki nous, nous comprend sa. Parceki à part nous péna personne ki pou change destin de sa le monde là. Et si nous, nous

pas comprend, bé ki sanlà ki pou comprend. Donc, comprend l'urgence de la situation ki mo pé mette devant ou ki mo fine bizin prend plisse ki deux Khutba Jummahs pou faire ou comprend sa, ki ou bizin présente ou au service d'Allah. Et dire Allah ki la situation fine dépasse ene limite. Li en dehors de nous contrôle. Et cherche So l'aide. Kifaire sa ?

Premièrement nous faible. Nous pas digne pou faire la reforme du monde. Nous dire Allah : *« En céki concerne To bane prophètes et To bane bon serviteurs d'avant, c'est To même ki ti mette bane tel bon qualités dans zot de sorte ki zot ti conscient de la situation du monde et zot ti ena aussi la capacité de reforme le monde et c'est Toi ki fine éloigne zot bane faiblesses. Mais nous, nous situation li tel ki nous péna même la capacité pou éloigne nous propre faiblesses. Tout le temps nous pensé et tout le temps nous faire zéfforts mais nous retrouve nous dans même situation. Ni nous le cœur changé, ni nous l'environnement changé. Ni nous traitement avec nous bane famille pé changer, ni nous traitement avec bane Ghayr (non-croyants) aussi pé changer. Dans ki qualités problèmes nous-mêmes nous été. Et lors là, la situation de bane dimounes ki nous ti bizin faire zot reforme, pé continuer empirer aller même. Alors sans To l'aide nous pas pou arrive à nannié. Nous envie vine sous To refuge et jouir d'ene proximité avec Toi ki pou fer Toi plaisir et afin ki nous réussi fer la réforme du monde couma To fine donne nous la responsabilité. »*

Li nécessaire ki ou crée sa sentiment là parceki si ou vine insouciant, si ou pas prend aucaine conte de bane instructions d'Allah et fer le pas en avant pou vine vers Li, alors ou pou pareil couma bane zanimaux féroces. Donc, c'est sa même c'est ki mo pé dire ki li ene très grand erreur si nous pas conscient de la situation de nous l'environnement. Sa c'est la qualité de bane zanimaux féroces. Si ou négligent et si ou pas d'aucaine utilités pareil couma bane zanimaux féroces, bé à ce moment là ou aussi ou situation pou pareil. Donc li nécessaire ki ou vine parmi bane camarades proches d'Allah.

Et pou vine bane proches d'Allah, li nécessaire ki ou adopter bane chemins et bane qualités ki fine indiquer au commencement kot mo pé faire comprend ki li nécessaire ki ou adopter sa bane chemins et bane qualités là afin ki ou vine bane proches d'Allah et afin ki aucaine problème, aucaine obstacle, aucaine la peine pas oser mette la main lors ou.

Maintenant sa zaffaire ki aucaine la peine et difficultés pas oser mette la main lors ou, c'est ene tel sujet ki kan ou guette la vie et situation de bane dimounes sincère du Jamaat, ou capave comprend. Mo fine guetter bane dimounes ki nuit et jours engager dans le travail du Jamaat, zot pas faire face bane problèmes ki zot l'environnement faire face. Ena boucou bane tel témoins coumsa dans le Jamaat ki zot pas fine prend aucaine conte ki pou traverse lors zot, ki pou traverser lors zot familles et zenfants, zot fine nek donne nécessité de la religion l'importance. À ce moment là Allah fine prend zot, zot madame/s et zot bane zenfants aussi conte. Mais sa li parfaitement vrai aussi ki bane dimounes ki pou la cause d'Allah, zot rejette zot propre le monde et zot adopté le monde d'Allah, bé sa c'est bane dimounes ki Allah protège zot

le monde. Certes sous la loi de la nature, zot capave faire face à quelques problèmes, pareil couma même bane plantes ki en bonne santé aussi, zot aussi zot souffert bane dégâts, bane problèmes. Parfois ena bane tempêtes, bane cyclones et inondations et même bane bons plantations affecter par sa.

Donc, mo pas dire ou ki kan ou engager dans bane travaux de la religion, bé bane maladies du monde pas pou touche ou. Si ou engager dans le travail de la religion juste avec sa pensée là ki bane maladies mondaines pas pou touche ou, bé à ce moment là zot pou certainement touche ou. Mais si kan ou engager dans le travail de la religion, ou pas casse la tête, si pas kikaine pou guette ou, ou madame, zenfant (**en plaçant ou confiance en Allah**), bé c'est à ce moment là ki Allah pou surveille ou madame et ou bane zenfants. Ena encore bane lézot situations, kot bane dimounes travail pou la religion d'Allah seulement, zot pas casse zot la tête avec bane zaffaires mondaine, pou zot, zot préférence c'est Allah et So religion. Pou sa bane dimounes là Allah dire dans Quran (9: 111):

**« Innallaa hashtaraa minal mu miniina anfusahuum wa amwaa lahum bi annaa lahumul-jannah »** Allah fine acheter le corps et du bien bane ki ena la foi, et donne zot en retour paradis.

Ki pli meilleur ki sa ? Personne pas pou comprend sa qualités grâces et faveurs ki Allah fine réserver pou sa bane qualités dimounes là. Zot péna aucaine attraction, ni plaisir de sa le monde là, zot pli dans bien ki bane les autres ki attiré avec sa le monde ici-bas là. Pou zot c'est Allah, So messager, So religion ki pli priorité pou zot ki tous les autres zaffaires ki les autres créatures pé chercher. Au contraire zot dire (pou dimoune ki cherche sa bane attractions lémonde là) : « *To pé cherche tous attraction et plaisir de sa le monde là, bé prend tous pou toi ; moi mo cherche seulement mo Maître de l'univers.* » Ki ou oulé plisse ki sa ? Seulement bane *Ulul'al-Baab* (dimounes doué d'intelligence) ki capave comprendre. Sa même révélation mo ti recevoir de coté d'Allah.

**« Si Allah avec toi, même si le monde pas avec toi, tous avec toi, mais si Allah pas avec toi, même si le monde avec toi, nannié pas avec toi. »** Quel message! Allah So bane messages vraiment ene source de lumière pou nous. *Masha-Allah, Allahu-Akbar.*

Donc, si ou envie trouve so application, bé ou bizin passe par sa bane stages là, ou bizin vine parmi bane proches d'Allah afin ki aucaine problèmes pas capave touche ou, parceki nannié pas arriver lors la terre sans la permission d'Allah. Guette ki qualités grand sa bane paroles là été. En fait, kan ou vine sous le refuge d'Allah, bé ene résultat naturel de sa bizin crée dans ou le cœur et li bizin ene zaffaire ki paraitre dans ou même.

Puisque le temps fine fini kot ena bizin alle travail, et zot fine gagne seulement ene ti permission pou Jumma, alors mo va continuer sa Khutba là après *Bakr-Eid*. *Insha-Allah*, ki Allah donne moi sa *Tawfiq* là. *Ameen.*

**Announce:** Avant mo terminé, mo ti envie cause brièvement lors sa incident bien malheureux ki fine passé la semaine dernière (04-05 Septembre 2015) à Rivière des Anguilles dans le sud de Maurice. Le Jamaat Ul Sahih Al Islam et sa humble serviteur là condamne catégoriquement saki certains soi-disant « musulmans » insensé et ti l'esprit fine faire dans temple Amma Tookay sous l'influence de l'alcol, kot zot fine casse bane idoles ki ti ena là-bas.

L'Islam li ene religion de tolérance, et ki prêche : *Péna aucaine contrainte dans la religion* et li aussi enseigne le respect de l'autre. Allah, nous Créateur rempli de gloire, et nous modèle parfait Hazrat Muhammad (saws) tous les deux fine condamné bane tels actes coumsa parski, quand kikaine, en l'occurrence ene dimoune ki li dire ki li ene musulman, maltraite la religion de bane les autres et casse zot bane idoles par zot même, d'après zot propre l'esprit, alors ça en fait li ene invitation ki li pé provoqué pour ki sa bane les autres là maltraite Allah et l'Islam et pou détruire bane l'enseignements parfaits de l'Islam. Et en plisse de sa, bane boissons alcolik zot absolument interdit dans l'Islam. De ce fait, bane actions de sa bane kalité dimounes là pas Islamiques du tout. Au contraire, zot pé présente ene bien mauvais l'image de l'Islam et de so bane l'enseignements. Ki Allah protège So *Deen-e-Islam* de sa bane kalité dimounes insensé là ki zot « musulmans » que de nom, et ki pé présente l'Islam couma ene religion ki tolère la violence et le terrorisme. *Ameen*.